

四庫全書

子部

欽定四庫全書

子部
經濟類編卷九十

詳校官中書臣瞿 煦

主事臣 祁韻士覆勘

總校官知縣臣 繆 琪

校對官編修臣 沈清藻

謄錄監生臣 左顯若

欽定四庫全書

經濟類編卷九十

人事類二

正道

五十一

則

明

馮琦馮瑗 撰

晉邢侯與雍子爭鄆田久而無成士景伯如楚叔魚攝
理韓宣子命斷舊獄罪在雍子雍子納其女於叔魚叔
魚蔽罪邢侯邢侯怒殺叔魚與雍子於朝宣子問其罪

於叔向叔向曰三人同罪施生戮死可也雍子自知其罪而賂以買直鮒也幣獄邢侯專殺其罪一也已惡而掠美爲昏貪以敗官爲墨殺人不忌爲賊夏書曰昏墨賊殺臯陶之刑也請從之乃施邢侯而尸雍子與叔魚於市仲尼曰叔向古之遺直也治國制刑不隱於親三數叔魚之惡不爲末減曰義也夫可謂直矣平丘之會數其賄也以寬衛國晉不爲暴歸魯季孫稱其詐也以寬魯國晉不爲虐邢侯之獄言其貪也以正刑書晉不

爲頗三言而除三惡加三利殺親益榮猶義也夫

齊景公飲酒移於晏子家前驅報閭曰君至晏子披玄
端立於門曰諸侯得微有故乎國家得微有故乎君何
爲非時而夜辱公曰酒醴之味金石之聲願與夫子樂
之晏子對曰夫布薦席陳簋簞者有人臣不敢與焉公
曰移於司馬穰苴之家前驅報閭曰君至司馬穰苴介
冑操戟立於門曰諸侯得微有兵乎大臣得微有叛乎
君何爲非時而夜辱公曰酒醴之味金石之聲願與夫

子樂之對曰夫布薦席陳簋籩者有人臣不敢與焉公曰移於梁丘據之家前驅報閭曰君至梁丘據左操瑟右挈竽行歌而至公曰樂哉今夕吾飲酒也微二子者何以治吾國微此一臣者何以樂吾身賢聖之君皆有益友無偷樂之臣景公弗能及故兩用之僅得不亡

漢申屠嘉爲人廉直門不受私謁是時大中大夫鄧通方愛幸賞賜累鉅萬文帝常燕飲通家其寵幸無比嘉嘗入朝而通居上旁有怠慢之禮嘉奏事畢因言曰陛

下幸愛羣臣則富貴之至於朝廷之禮不可以不肅文
帝曰君勿言吾私之罷朝坐府中嘉爲檄召通詣丞相
府不來且斬通通恐入言文帝文帝曰汝第往吾今使
人召若通詣丞相免冠徒跣頓首謝嘉嘉坐自如弗爲
禮責曰夫朝廷者高帝之朝廷也通小臣戲殿上大不
敬當斬吏今行斬之通頓首首盡出血不解文帝度丞
相已困通使使持節召通而謝丞相此吾弄臣君釋之
鄧通既至爲文帝泣曰丞相幾殺臣

張湯爲廷尉多詐舞智以御人時武帝方鄉文學湯陽
浮慕事董仲舒公孫弘等以千乘兒寬爲秦讞掾以古
法義決疑獄所治即上意所欲罪與監史深禍者即上
意所欲釋與監史輕平者武帝由是悅之湯於故人子
弟調護之尤厚其造請諸公不避寒暑是以湯雖文深
意思不專平然得此聲譽汲黯數質責湯於上前曰公
爲正卿上不能褒先帝之功業下不能抑天下之邪心
安國富民使囹圄空虛何空取高皇帝約束紛更之爲

而公以此無種矣黠時與湯論議湯辯常在文深小苛黠
伉厲守高不能屈忿發罵曰天下謂刀筆吏不可以爲
公卿果然必湯也令天下重足而立側目而視矣

汲黯過大行李息曰黯棄居郡不得與朝廷議也然御
史大夫張湯智足以拒諫詐足以飾非務巧佞之語辨
數之辭非肯正爲天下言專阿主意主意所不欲因而
毀之主意所欲因而譽之好興事舞文法內懷詐以御
主心外挾賊吏以爲威重公列九卿不早言之公與之

俱受其僂矣息畏湯終不敢言黯居郡如故治淮陽政
清後張湯果敗上聞黯與息言抵息罪

成帝時丞相故安昌侯張禹以帝師位特進甚尊重朱
雲上書求見公卿在前雲曰今朝廷大臣上不能匡主
下亡以益民皆尸位素餐孔子所謂鄙夫不可與事君
苟患失之亡所不至也臣願賜尚方斬馬劍斷佞臣
一人以厲其餘上問誰也對曰安昌侯張禹上大怒曰
小臣居下訕上廷辱師傅罪死不赦御史將雲下雲攀

殿檻檻折雲呼曰臣得下從龍逢比干遊於地下足矣
未知聖朝何如耳御史遂將雲去於是左將軍辛慶忌
免冠解印綬叩頭殿下曰此臣素著狂直於世使其言
是不可誅其言非固當容之臣敢以死爭慶忌叩頭流
血上意解然後得已及後當治檻上曰勿易因而輯之
以旌直臣雲自是之後不復仕常居鄆田時出乘牛車
從諸生所過皆敬事焉

成帝外家王氏衰廢唯平阿侯王譚子去疾哀帝為太

子時為庶子得幸及即位為侍中騎都尉上以王氏亡
在位者遂用舊恩親近去疾復進其弟王閔為中常侍
閔妻父蕭咸前將軍望之子也久為郡守病免為中郎
將兄弟並列董賢父董恭慕之欲與結婚姻閔為賢弟
駙馬都尉寬信求咸女為婦咸惶恐不敢當私謂閔曰
董公為大司馬冊文言允執其中此迺堯禪舜之文非
三公故事長老見者莫不心懼此豈家人子所能堪邪
閔性有知畧聞咸言心亦悟迺還報恭深達咸自謙薄

之意恭歎曰我家何用負天下而為人所畏如是意不
說後上置酒麒麟殿賢父子親屬宴飲王閔兄弟侍中
中常侍皆在側上有酒所從容視賢笑曰吾欲法堯禪
舜何如閔進曰天下迺高皇帝天下非陛下之有也陛
下承宗廟當傳子孫於亡窮統業至重天子亡戲言上
默然不說左右皆恐於是遣閔出後不得復侍宴

哀帝崩太后即日引王莽入收大司馬董賢印綬詔有
司舉可大司馬者莽故大司馬辭位辟丁傅衆庶稱以

為賢又太后近親自大司徒孔光以下舉朝皆舉莽何武為前將軍素與左將軍公孫祿相善二人獨謀以為往時孝惠孝昭少主之士外戚呂霍上官持權幾危社稷今孝成孝哀比世無嗣方當選立親近輔幼主不宜令異姓大臣持權親疎相錯為國計便於是武舉公孫祿可大司馬而祿亦舉武太后竟自用莽為大司馬莽風有司劾奏武公孫祿互相舉皆免

汝南太守歐陽歙請鄧暉為功曹舊俗十月享會百里

內縣皆齋牛酒到府讌飲時臨享禮訖歛教曰西都督
郵繇延天資忠貞稟性公方摧破奸凶不嚴而理今與
衆儒共論延功顯之於朝太守敢嘉厥休牛酒養得主
簿讀書教戶曹引延受賜憚於下坐愀然前曰司正舉
觥以君之罪告謝於天按延資性貪邪外方內員朋黨
搆奸罔上害人所在荒亂怨慝並作明府以惡為善股
肱以直從曲此既無君又復無臣憚敢再拜奉觥歛色
慙動不知所言門下掾鄭敬進曰君明臣直功曹言切

明府德也可無受觥哉歛意稍解曰實歛罪也敬奉觥
憚乃免冠謝曰昔虞舜輔堯四罪咸服讒言弗庸孔壬
不行故能作股肱帝用有歌憚不忠孔壬是昭豺虎從
政既陷誹謗又露所言罪莫重焉請收憚延以明好惡
歛曰是重吾過也遂不讎而罷憚歸府稱病延亦自退
鄭敬素與憚厚見其言忤歛乃相招去曰子廷爭繇延
君猶不納延今雖去其執必還直心無諱誠三代之道
然道不同者不相為謀吾不能忍見子有不容君之危

孟去之乎憚曰孟軻以彊其君之所不能為忠量其君之所不能為賊憚業已彊之矣障君於朝既有其直而不死職罪也延退而憚又去不可敬乃獨隱於弋陽山中居數月歛果復召延憚於是乃去從敬止漁釣自娛留數十日憚志在從政既乃喟然而嘆謂敬曰天生俊士以為人也鳥獸不可與同羣子從我為伊呂乎將為巢許乎而父老堯舜也敬曰吾足矣初從生步重華於南野謂來歸為松子今幸得全軀樹類還奉墳墓盡問

學道雖不從政施之有政是亦為政也吾年老矣安得從子子勉正性命勿勞神以害生憚於是告別而去

光武以宋弘為大司空弘薦桓譚為給事中光武令譚鼓琴愛其繁聲弘聞之不悅伺譚內出正朝服坐府上遣吏召之譚至不與席而讓之且曰能自改邪將令相舉以法乎譚頓首辭謝良久乃遣之後大會羣臣光武使譚鼓琴譚見弘失其常度光武怪而問之弘乃離席免冠謝曰臣所以為桓譚者望能以忠正導主而令朝

廷耽悅鄭聲臣之罪也光武改容謝之

洛陽令董宣舉糾湖陽公主光武帝始怒收宣既而赦
之蔡茂喜宣剛正欲令朝廷禁制貴戚乃上書 臣聞
興化致教必由進善康國寧人莫大理惡陛下聖德中
興再隆大命即位以來四海晏然誠宜夙興夜寐雖休
勿休然頃者貴戚椒房之家數因恩勢干犯吏禁殺人
不死傷人不論臣恐繩墨棄而不用斧斤廢而不舉近
湖陽公主奴殺人西市而與主共輿出入官省逋罪積

日寃魂不報洛陽令董宣直道不顧干主討姦陛下不
先澄審召欲加審當宣受怒之初京師側耳及其蒙宥
天下拭目今者外戚驕逸賓客放濫宜教有司案理姦
罪使執平之吏永申其用以厭遠近不緝之情

西南夷揮國王獻樂及幻人能吐火自支解易牛馬頭
明年元會作之於庭安帝與羣臣共觀大奇之陳禪獨
離席舉手大言曰昔齊魯為夾谷之會齊作侏儒之樂
仲尼誅之又曰放鄭聲遠佞人帝王之庭不宜設外夷

之技尚書陳忠劾奏禪曰古者合歡之樂舞於堂四夷
之樂陳於門故詩云以雅以南韎任朱離今禪國越流
沙踰縣度萬里貢獻非鄭衛之聲佞人之比而禪廷訕
朝政請劾禪下獄有詔勿收左轉為玄菟候城障尉

桓帝遊上林苑從容問爰延曰朕何如主也對曰陛下
爲漢中主帝曰何以言之對曰尚書令陳蕃任事則化
中常侍黃門豫政則亂是以知陛下可與爲善可以爲
非帝曰昔朱雲廷折欄檻今侍中面稱朕違敬聞闕矣

史弼為平原相時詔書下舉鉤黨郡國所奏相連及者多至數百唯弼獨無所上詔書前後切却州郡髡笞掾史從事坐傳責曰詔書疾惡黨人旨意懇惻青州六郡其五有黨近國甘陵亦考南北部平原何理而得獨無弼曰先王疆理天下畫界分境水土異齊風俗不同他郡自有平原自無胡可相比若承望上司誣陷良善淫刑濫罰以逞非理則平原之人戶可為黨相有死而已所不能也從事大怒即收郡僚職送獄遂舉奏弼會黨

禁中解弼以俸贖罪得免濟活者千餘人

靈帝以中常侍趙忠為車騎將軍使忠論討黃巾之功
執金吾甄舉謂忠曰傳南容前在東軍有功不侯天下
失望今將軍親當重任宜進賢理屈以副衆心忠納其
言遣弟城門校尉延致殷勤於傳變延謂變曰南容少
答我常侍萬戶侯不足得也變正色拒之曰有功不論
命也傳變豈求私賞哉忠愈懷恨然憚其名不敢害出
為漢陽太守

范曄陳蕃竇武傳論 桓靈之世若陳蕃之徒咸能樹
立風聲抗論昏俗而驅馳嶮阨之中與刑人腐夫同朝
爭衡終取滅亡之禍者彼非不能潔情志違埃霧也愍
夫世士以離俗為高而人倫莫相恤也以遯世為非義
故屢退而不去以仁心為己任雖道遠而彌厲及遭際
會協策竇武自謂萬世一遇也慄慄乎伊望之業矣功
雖不終然其信義足以攜持民心漢世亂而不亡百餘
年間數公之力也

蓋勳爲京兆每軍國密事靈帝常手詔問之數加賞賜甚見親信在朝臣右及帝崩董卓廢少帝殺何太后勳與書曰昔伊尹霍光權以立功猶可寒心足下小醜何以終此賀者在門弔者在廬可不慎哉卓得書意甚憚之徵爲議郎時左將軍皇甫嵩精兵三萬屯扶風勳密相要結將以討卓會嵩亦被徵勳以衆弱不能獨立遂並還京師自公卿以下莫不卑下於卓唯勳長揖爭禮見者皆爲失色卓問司徒王允曰欲得快司隸校尉誰

可作者允曰唯有益京兆耳卓曰此人明智有餘然不可假以雄職乃以為越騎校尉卓又不欲令久典禁兵復出為潁川太守未及至郡徵還京師時河南尹朱雋為卓陳軍事卓折雋曰我百戰百勝決之於心卿勿妄說且汙我刀勲曰昔武丁之明猶求箴諫况如卿者而欲杜人之口乎卓曰戲之耳勲曰不聞怒言可以為戲卓乃謝雋勲雖強直不屈而內厭於卓不得意疽發背卒時年五十一遺令勿受卓賻贈卓欲外示寬容表賜

東園祕器贈榼送之如禮葬於安陵

魏光祿大夫徐邈以清節著名盧欽嘗著書稱邈曰徐公志高行潔才博氣猛其施之也高而不狷潔而不介博而守約猛而能寬聖人以清為難而徐公之所易也或問欽徐公當武帝之時人以為通自為涼州刺史及還京師人以為介何也欽答曰往者毛孝先崔季珪用事貴清素之士於時皆變易車服以求名高而徐公不改其常故人以為通比來天下奢靡轉相倣倣而徐公

雅尚自若不與俗同故前日之通乃今日之介也是世人之無常而徐公之有常也

進晉公司馬昭爵為王增封十郡王祥何曾荀顛共詣晉王顛謂祥曰相王尊重何侯與一朝之臣皆已盡敬今日便當相率而拜無所疑也祥曰相國雖尊要是魏之宰相吾等魏之三公王公相去一階而已安有天子三公可輒拜人者損魏朝之望虧晉王之德君子愛人以禮我不為也及入顛遂拜而祥獨長揖王謂祥曰今

日然後知君見顧之重也

晉武帝在江州山陰戴法興戴明寶蔡閑為典籤及即位皆以為南臺侍御史凡選授遷徙誅賞大處分武帝皆與法興尚之參懷內外雜事多委明寶三人權重當時而法興明寶大納貨賄凡所薦達言無不行天下輻湊門外成市家產並累千金吏部尚書顧覲之獨不降意於法興等蔡興宗與覲之善嫌其風節太峻覲之曰辛毗有言孫劉不過使吾不為三公耳覲之常以為人

稟命有定分非智力所移唯應恭已守道而闇者不達
妄意僥倖徒虧雅道無關得喪乃以其意命弟子愿著
定命論以釋之

羊祜在軍常輕裘緩帶身不被甲鈴閣之下侍衛者不
過十數人而頗以畋漁廢政嘗欲夜出軍司徐胤執祭
當營門曰將軍都督萬里安可輕脫將軍之安危亦國
家之安危也胤今日若死此門乃開耳祜改容謝之此
後稀出矣

王敦舉兵入石頭愍帝使王彬勞之會周顛遇害彬素與顛善先往哭顛甚慟既而見敦敦怪其有慘容而問其所以彬曰向哭伯仁情未能已敦怒曰伯仁自致刑戮且凡人遇汝復何為者哉彬曰伯仁長者君之親友在朝雖無謬諤亦非阿黨而赦後中以極刑所以傷惋也因勃然數敦曰兄抗旌犯順殺戮忠良謀圖不軌禍及門戶音詞慷慨聲淚俱下敦大怒厲聲曰爾狂悖乃可至此為吾不能殺汝耶時王導在坐為之懼勸彬起

謝彬曰有脚疾已來見天子尚欲不拜何跪之有此復何所謝敦曰脚痛孰若頭痛彬意氣自若殊無懼容後議舉兵向京師彬諫甚苦敦變色目左右將收彬彬正色曰君昔歲害兄今又殺弟耶先是彬從兄豫章太守陵為敦所害敦以彬親故容忍之俄而以彬為豫章太守彬為人樸素方直乏風味之好雖居顯位常布衣蔬食遷前將軍江州刺史及敦死王含欲投王舒王應勸含投彬含曰大將軍平素與江州云何汝欲歸之應曰

此乃所以宜往也。江州當人彊盛時，能立同異，此非常人所及。覩衰危，必興愍惻。荊州守文，豈能意外行事？舍不從，遂共投舒。舒果沈含父子於江彬，聞應來，密具船以待之。既不至，深以為恨。

楊駿弟楊濟，素與傅咸相善。與咸書曰：「江海之流，混混故能成其深廣也。天下大器，非可稍了，而相觀每事欲了。生子癡了官事，官事未易了也。了事正作癡，復為快耳。左丞總司天臺，雖正八座，此未易居。以君盡性而處。」

未易居之任益不易也想慮破頭故具有白咸答曰衛公云酒色之殺人此甚於作直坐酒色死人不為悔逆畏以直致禍此由心不直正欲以苟且為明哲耳自古以直致禍者當自矯枉過直或不忠允欲以亢厲為聲故致忿耳安有慳慳為忠益而當見疾乎

嵇紹嘗詣齊王冏諮事遇冏燕會召董艾葛旟等共論時政艾言於冏曰嵇侍中善於絲竹公可令操之左右進琴紹推不受冏曰今日為懽卿何吝此耶紹對曰公

匡復社稷當執物作則垂之於後紹雖虛鄙忝備常伯
腰紱冠冕鳴玉殿省豈可操執絲竹以為伶人之事若
釋公服從私宴所不敢辭也冏大慙艾等不自得而退
顏含為光祿大夫門施行馬賜牀帳被褥勅大官四時
致膳固辭不受於時論者以王導帝之師傅名位隆重
百僚宜為降禮太常馮懷以問含含曰王公雖重理無
偏敬降禮之言或是諸君事宜鄙人老矣不識時務既
而告人曰吾聞伐國不問仁人向馮祖思問佞於我我

有邪德乎

陶回性雅正不憚彊禦丹陽尹桓景佞事王導甚為導所昵回常慷慨謂景非正人不宜親狎會熒惑守南斗經旬導語回曰南斗揚州分而熒惑守之吾當遜位以厭此適回答曰公以明德作相輔弼聖主當親忠貞遠邪佞而與桓景造膝熒惑何由退舍導深愧之

尹緯性剛簡清亮慕張子布之為人馮翊段鏗性傾巧姚萇愛其博識引為侍中緯固諫以為不可萇不從緯

屢衆中辱鏗鏗心不平之萇聞而謂緯曰卿性不好學何為憎學者緯曰臣不憎學憎鏗不正耳萇因曰卿好不自知每比蕭何真何如也緯曰漢祖與蕭何俱起布衣是以相貴陛下起貴中是以賤臣萇曰卿實不及胡為不也緯曰陛下何如高祖萇曰朕實不如漢祖卿遠蕭何故不如甚也緯曰漢祖所以勝陛下者以其遠段鏗之徒故耳萇默然乃出鏗為北地太守

卞壺幹實當官以褒貶為己任勤於吏事欲軌正督世

不肯苟同時好然性不弘裕才不副意故為諸名士所少而無卓爾優譽明帝深器之於諸大臣而最任職阮孚每謂之曰卿恒無閒泰常如含瓦石不亦勞乎壺曰諸君以道德恢宏風流相尚執鄙吝者非壺而誰時貴游子弟多慕王澄謝鯤為達壺厲色於朝曰恃禮傷教罪莫斯甚中朝傾覆實由於此欲奏推之王導庾亮不從乃止然而聞者莫不折節

北魏世祖畋於河西尚書令古弼留守詔以肥馬給獵

騎弼悉以弱者給之世祖大怒曰筆頭奴敢裁量朕朕
還臺先斬此奴弼頭銳故世祖常以筆目之弼官屬惶
怖恐并坐誅弼曰吾為人臣不使人主盤於遊畋其罪
小不備不虞乏軍國之用其罪大今蠕蠕方彊南寇未
滅吾以肥馬供軍弱馬供獵為國遠慮雖死何傷且吾
自為之非諸君之憂也世祖聞之歎曰有臣如此國之
寶也賜衣一襲馬二匹鹿十頭他日世祖復畋於山北
獲麋鹿數千頭詔尚書發牛車五百乘以運之詔使已

去世祖謂左右曰筆公必不與我汝輩不如自以馬運之遂還行百餘里得弼表曰今秋穀懸黃麻菽布野豬鹿竊食鳥雁侵費風雨所耗朝夕三倍乞賜矜緩使得收載世祖曰果如吾言筆公可謂社稷之臣矣

齊海陵王即位起居飲食皆諮宣城王而後行嘗思食蒸魚菜大官令答無錄公命竟不與皇太后令曰嗣主冲幼庶政多昧弗克負荷太傅宣城王宜入承寶命明帝即皇帝位大赦改元以王敬則為大司馬陳顯達為

太尉王晏加驃騎大將軍徐孝嗣加中軍大將軍蕭謨
為領軍將軍度支尚書虞棕稱疾不陪位明帝以棕舊
人欲引參佐命使王晏齋廢立事示棕棕曰主上聖明
公卿戮力寧假朽老以贊惟新乎不敢聞命因慟哭朝
議欲糾之徐孝嗣曰此亦古之遺直乃止明帝與羣臣
宴飲詔功臣上酒王晏等興席謝淪獨不起曰陛下受
命應天順人王晏妄叨天功以為己力明帝大笑解之
座罷晏呼淪共載還令省欲相撫悅淪正色曰君巢窟

在何處晏甚憚之

唐太宗時魏徵寢疾上與太子同至其第指衡山公主欲以妻其子叔玉徵薨命百官赴喪給羽葆鼓吹陪葬昭陵其妻裴氏曰徵平生儉素今葬以羽儀非其志也悉辭不受以布車載柩而葬上登苑西樓望哭盡哀自置碑文并為書石謂侍臣曰人以銅為鏡可以正衣冠以古為鏡可以見興替以人為鏡可以知得失魏徵沒朕亡一鏡矣

天后嘗命朝貴宴集張易之兄弟皆位在宋璟上易之素憚璟欲悅其意虛位揖之曰公方今第一人何乃下坐璟曰才劣位卑張卿以為第一何也天官侍郎鄭杲謂璟曰丞奈何卿五郎璟曰以官言之正當為卿足下非張卿家奴何郎之有舉坐悚惕時自武三思以下皆謹事易之兄弟璟獨不為之禮諸張積怒常欲中傷之天后知之故得免

楊國忠既為相以天下為己任裁決機務果敢不疑居

朝廷攘袂扼腕公卿以下願指氣使莫不震懼臺省官
有才行時名不為己用者皆出之或勸陝郡進士張彖
謁國忠曰見之富貴立可圖彖曰君輩倚楊右相如泰
山吾以為冰山耳若皎日既出君輩得無失所恃乎遂
隱居嵩山

太常卿杜黃裳為裴延齡所惡留滯臺閣十年不遷及
其婿韋執誼為相始遷太常卿黃裳勸執誼帥羣臣請
太子監國執誼驚曰丈人甫得一官奈何啟口議禁中

事黃裳勃然曰黃裳受恩三朝豈得以一官相買乎拂衣起出

憲宗時吐突承璀方貴寵用事為淮南監軍李鄜為節度使性剛嚴與承璀互相敬憚故未嘗相失承璀歸引鄜為相鄜恥由宦官進曰吾老安外鎮宰相非吾任也鄜至京師辭疾不入見不視事百官到門者皆辭不見吐突承璀領功德使盛修安國寺奏立聖德碑先構樓請敕學士撰文欲以萬緡酬之上命李絳為之絳言堯

舜禹湯未嘗立碑自言聖德惟秦始皇刻石高自稱述未審陛下欲何所法且叙修寺之美豈所以光聖德耶上命曳倒碑樓承瓘言樓大不可曳請徐毀撤上厲聲曰多用牛曳之承瓘乃不敢言凡用百牛曳之乃倒

裴均素附宦官嘗入朝踰位而立御史中丞盧坦揖而退之均不從坦曰昔姚南仲為僕射位在此均曰南仲何人坦曰是守正不交權倖者坦尋改右庶子白居易上疏曰牛僧孺等直言時事而遭斥逐楊於陵等以敢

直言而坐譴謫盧坦以舉職事而黜庶子此數人皆今
之人望天下視其進退以卜時之否臧者也一旦無罪
悉疏棄之上下杜口衆心恟恟陛下亦知之乎且陛下
既下詔徵之直言索之極諫僧孺等所對如此縱未能
推而行之又何忍斥而罪之

鄭注為鳳翔節度使欲取名家才望之士為參佐請禮
部員外郎韋溫為副使溫不可或曰拒之必為患溫曰
擇禍莫若輕拒之止於遠貶從之有不測之禍卒辭之

憲宗之崩上疑郭太后預其謀又鄭太后本郭太后侍
兒有宿怨故宣宗即位待郭太后禮殊薄郭太后意怏
怏一日登勤政樓欲自墮上聞之大怒是夕暴崩外人
頗有異論上不欲以郭后附葬憲宗有司請葬景陵外
園禮院檢討官王皞奏宜合葬祔廟上大怒白敏中召
皞詰之皞曰太皇太后汾陽王之孫憲宗在東宮為正
妃母天下歷五朝豈得以曖昧之事遽廢正嫡之禮乎
敏中怒甚皞氣愈厲周墀見之舉手加額歎其孤直皞

竟坐貶句容令

後周天策府學士徐仲雅自馬希廣之廢杜門不仕周
行逢慕之署節度判官仲雅曰行逢昔趨事我奈何為
之幕吏辭疾不至行逢迫脅固召之面授文牒終辭不
取行逢怒放之邵州既而召還會行逢生日諸道各遣
使致賀行逢有矜色謂仲雅曰自吾兼鎮三府四隣亦
畏我乎仲雅曰侍中境內彌天太保徧地司空四隣那
得不畏行逢復放之邵州竟不能屈

宋太宗以上元御乾元門樓觀燈賜宴見京師繁盛諭
近臣曰五代之際生靈凋喪周太祖自鄴南歸士庶皆
懼剽掠下則火光上則彗孛觀者恐慄當時謂無復太
平之日矣朕躬覽庶政萬事粗理每念上天之貺致此
盛乃知理亂在人呂蒙正避席曰乘輿所在士庶走集
故繁盛如此臣嘗見都城外不數里饑寒而死者甚衆
願陛下親近以及逮蒼生之幸也帝變色不言蒙正侃
然復位同列咸多其伉直

真宗時樞密副使包拯性峭直耿介與人不苟合不一毫妄取平居無私書故人親黨干謁一切絕之然惡吏苛刻務敦厚於人未嘗不恕其飲食服用喜儉朴雖貴如布衣時卒贈禮部尚書諡孝肅

王欽若方挾符瑞以固寵位陰排異己者會有詔以王曾為會靈觀使曾以推欽若帝不悅謂曾曰大臣宜傳會國事何遽自異耶曾頓首曰君從諫謂明臣盡忠謂義陛下不知臣驚病使待罪宰府臣知義而已不知異

也

丁謂擅權用事至除吏不以聞李迪憤然謂同列曰迪起布衣至宰相有以報國死猶不恨安能附權倖為自安計耶會議二府皆進秩兼東宮官迪以為不可謂又欲引林特為樞副迪復沮之謂積怒既而謂加門下侍郎兼太子太傅迪加尚書左丞仍兼太子少傅故事宰相無兼左丞者及入對長春殿內出制書置榻前帝謂輔臣曰此卿等兼東宮官制也迪進曰東宮官屬不當

增置臣不敢受命丁謂罔上弄權私林特錢惟演而嫉
寇準特子殺人事寢不治準無罪遠謫惟演以皇后姻
家使預朝政曹利用馮拯相為朋黨臣願與謂俱罷付
御史臺劾正帝怒留制不下左遷迪知鄆州謂知河南
府明日謂入謝帝詰所爭狀謂對曰非臣敢爭乃迪詈
臣爾願復留遂自出傳口詔復入中書視事時劉筠已
草迪謂同罷制既而謂復留命草制筠不奉詔乃更召
學士晏殊草之筠自院出遇殊殊皇愧側面不敢與揖

謂既復位益擅權專恣筠曰姦人用事安可一日居此力請補外遂知廬州筠初為楊億所識拔後遂與億齊名時號楊劉

仁宗時京師久旱遣使祠禱嶽瀆羣臣請帝親禱於郊帝曰太史言月二日當雨今將以旦日出禱王素曰臣非太史然度是日必不雨帝問其故素對曰陛下知其且雨而禱之應天不以誠故也帝竦然詔明日詣西太一宮諫官故不在屬車間時命素扈從日甚熾埃氛翳

空比車駕還未薄城天大雷電而雨時王德用進二女
素論之帝曰朕真宗皇帝子卿王旦子也有世舊非他
人比德用實進女然已事朕左右奈何素曰臣之憂正
恐在左右爾帝動容立命遣女出宮而賜素銀緋

劉太后臨朝魯宗道屢有獻替后嘗問唐武后何如主
對曰唐之罪人也幾危社稷后默然有小臣方仲弓請
立劉氏七廟后問諸輔臣衆不敢對宗道獨進曰若立
劉氏七廟如嗣君何乃止后嘗與帝同幸慈孝寺欲乘

輦先行宗道以夫死從子之義爭之后遽命輦後乘輿
宗道剛正嫉惡遇事敢言貴戚用事者皆憚之目為魚
頭參政因其姓且言骨鯁也卒謚簡肅

張貴妃巧慧多智數善承迎至贈其父堯封為郡王世
父堯佐至太師姍戚莫不顯貴然仁宗守法度事無大
小悉付外廷議凡宮禁干請雖已賜可或輒中卻妃嬖
幸少比然終不得紊政及卒帝憂悼甚至輟朝七日禁
京城舉樂一月追冊為皇后治喪皇儀殿知制誥王洙

摺撫非禮陰與內侍石全斌附會欲令孫沔讀冊宰相
護葬帝從之沔曰陛下若以臣沔讀冊則可以樞密副
使讀冊則不可遂求罷乃知杭州時陳執中爲首相奉
行唯謹且引洙爲員外翰林學士士論由是爭咎執中
張堯佐復除宣徽使知河陽命下唐介謂同列曰是欲
與宣徽而假河陽爲名耳獨抗言之仁宗謂曰除擬本
出中書介遂劾文彥博知益州日造間金竒錦緣閣侍
通宮掖以得執政今顯用堯佐益自固結請罷之而相

富弼語甚切直帝怒卻其奏不視且曰將遠竄介徐讀
疏畢曰臣忠憤所激鼎鑊不避何辭於謫帝急召執政
示之曰介論事是其職至於彥博由妃嬪致宰相此何
言也進用冢司豈應得預而乃薦弼時彥博在帝前介
責之曰彥博宜自省即有之不可隱彥博拜謝不已帝
怒益甚梁適叱介使下殿修起居注蔡襄趨進救之貶
春州別駕王舉正言其太重帝亦悟明日取其疏入改
英州而罷彥博知許州吳奎亦以介黨出之密州帝慮

介或道死有殺直臣名命中使護之由是介直聲聞天下然彥博事之有無卒莫能辯 王偁曰彥博雖有過宰相也使廷辱宰相而不問則於眷禮大臣之道有所未盡故斥介以慰彥博介雖訐臺諫也或偏信大臣而抑臺諫則於聽言之美為有媿故罷彥博而行介之言使之俱無怨焉嗚呼忘己以用人虛心而從諫後之君人者當以仁宗為法

哲宗起范鎮提舉中太乙宮兼侍讀且欲以為門下侍

郎鎮雅不欲起從孫祖禹亦勸止之遂固辭不拜以銀
青光祿大夫再致仕卒諡忠文鎮清白坦夷恭儉慎默
篤於行義口不言人過臨大節決大議色和而語莊常
欲繼之以死雖在萬乘前無所屈其學本六經口不道
佛老申韓之說契丹高麗皆傳誦其文熙寧元豐之際
天下賢士大夫望以為相者鎮與司馬光二人至稱之
曰景仁君實不敢有所軒輕

廉希憲立朝謹正有內侍入朝堂傳旨言某事當爾希

憲曰此閣官預政之漸不可啓也入奏杖之蒙
古主嘗令希憲受帝師戒希憲對曰臣已受孔
子戒矣蒙古主曰汝孔子亦有戒耶對曰為臣
當忠為子當孝孔子之戒如是而已時有詔釋
大都囚西域人鼎智密鼎為怨家所訴繫獄亦
被原免蒙古主自開平還怨家復訴之時希憲
在告實不預其事乃取堂判補署之曰天威不
測豈可幸其獨不署以荷免耶遂與左丞相耶

律鑄俱罷蒙古主嘗問侍臣希憲居家何為
阿哈瑪特曰日與妻拏宴樂耳帝曰希憲清
貧何從宴設阿哈瑪特愧而退阿哈瑪特欲
誣殺秦長卿劉仲澤尼瑪多卜丹三人兵部
尚書張雄飛力持以不可阿哈瑪特使人啗
之曰誠能殺此三人當處以參政雄飛曰殺
人以求大官不能為也阿哈瑪特怒出為灑
州安撫使累遷御史中丞行御史臺事阿哈

瑪特恐其子庫克新為江淮右丞不為所容改
陝西按察使未行阿哈瑪特死召拜參知政事
庫克新被逮敕廷臣雜問庫克新歷指宰執曰
汝曾受我家錢何得問我雄飛曰我曾受否曰
公獨無雄飛曰如是則我當問汝矣遂伏辜
順帝時大臣以兩京馳道狹隘奏毀民田廬廣
之已遣使督治蓋苗言馳道創自至元初何今
日獨以為狹力辨其不可乃止又欲出宿衛士

為郡長官俾以養貧苗曰郡長所以牧民豈養貧之地果不能自存賜之錢可也若任郡守必擇賢而後可議遂寢又欲與角觝者錢萬貫苗曰諸處告饑不蒙賑恤力戲何功獲此重賞乎於是丞相謂僚佐曰所以引蓋君至此欲其相助也乃每事沮抗如此後有公務毋白叅政苗聞即欲引去適有旨拜江南行臺御史中丞丞相怒不解比至復除甘肅行省左丞

公七則

呂覽貴公篇 昔先聖王之治天下也必先公公則天下平矣平得於公嘗試觀於上志有得天下者衆矣其得之以公其失之必以偏凡主之立也生於公故洪範曰無偏無黨王道蕩蕩無偏無頗遵王之義無或作好遵王之道無或作惡遵王之路天下非一人之天下也天下之天下也陰陽之和不長一類甘露時雨不私一物萬民之主不阿一人伯禽將行請所以治魯周公曰

利而勿利也。荆人有遺弓者而不肯索，曰：「荆人遺之，荆人得之，又何索焉？」孔子聞之，曰：「去其荆而可矣。」老聃聞之，曰：「去其人而可矣。」故老聃則至公矣，天地大矣，生而弗子成而弗有，萬物皆被其澤，得其利而莫知其所由。始此三皇五帝之德也。管仲有病，桓公往問之，曰：「仲父之病矣，漬甚，國人弗諱，寡人將誰屬國？」管仲對曰：「昔者臣盡力竭智，猶未足以知之也。今病在於朝夕之中，臣奚能言？」桓公曰：「此大事也，願仲父之教寡人也。」管仲敬

諾曰公誰欲相公曰鮑叔牙可乎管仲對曰不可夷吾
善鮑叔牙鮑叔牙之為人也清廉潔直視不已若者不
比於人一聞人之過終身不忘勿已則隰朋其可乎隰
朋之為人也上志而下求醜不若黃帝而哀不已若者
其於國也有不聞也其於物也有不知也其於人也有
不見也勿已乎則隰朋可也夫相大官也處大官者不
欲小察不欲小智故曰大匠不斷大庖不豆大勇不鬪
大兵不寇桓公行公去私惡用管子而為五伯長行私

阿所愛用豎刁而蟲出于戶人之少也愚其長也智故
智而用私不若愚而用公日醉而飾私利而立公貪戾
而求王舜弗能為

去私篇 天無私覆也地無私載也日月無私燭也四
時無私行也行其德而萬物得遂長焉黃帝言曰聲禁
重色禁重衣禁重香禁重味禁重室禁重堯有子十人
不與其子而授舜舜有子九人不與其子而授禹至公
也晉平公問於祁黃羊曰南陽無令其誰可而為之祁

黃羊對曰解狐可平公曰解狐非子之讐耶對曰君問
可非問臣之讐也平公曰善遂用之國人稱善焉居有
間平公又問祁黃羊曰國無尉其誰可而為之對曰午
可平公曰午非子之子耶對曰君問可非問臣之子也
平公曰善又遂用之國人稱善焉孔子聞之曰善哉祁
黃羊之論也外舉不避讐內舉不避子祁黃羊可謂公
矣墨者有鉅子腹䟽於秦其子殺人秦惠王曰先生之
年長矣非有他子也寡人已令吏弗誅矣先生之以此

聽寡人也腹蘗對曰墨者之法曰殺人者死傷人者刑此所以禁殺傷人也夫禁殺傷人者天下之大義也王雖為之賜而令吏弗誅腹蘗不可不行墨者之法不許惠王而遂殺之子人之所私也忍所私以行大義鉅子可謂公矣庖人調和而弗敢食故可以為庖若使庖人調和而食之則不可以為庖矣王伯之君亦然誅暴而不私以封天下之賢者故可以為王伯若使王伯之君誅暴而私之則亦不可以為王伯矣

劉向至公篇 書曰不偏不黨王道蕩蕩言至公也古
有行大公者帝堯是也貴為天子富有天下得舜而傳
之不私於其子孫也去天下若遺躡於天下猶然况其
細於天下者乎非帝堯孰能行之孔子曰巍巍乎惟天
為大惟堯則之易曰無首吉此蓋人君之公也夫以公
與天下其德大矣推之於此刑之於彼萬姓之所載後
世之所則也彼人臣之公治官事則不營私家在公門
則不言貨利當公法則不阿親戚奉公舉賢則不避仇

讐忠於事君仁於利下推之以恕道行之以不黨伊呂是也故顯名存於今是之謂公詩云周道如砥其直如矢君子所履小人所視此之謂也夫公生明偏生暗端慙生達詐偽生塞誠信生神夸誕生惑此六者君子之所慎也而禹桀之所以分也詩云疾威上帝其命多僻言不公也

唐高宗時任雅相為將未嘗奏親戚故吏從軍皆移所司補授謂人曰官無大小皆國家公器豈可便私由是

軍中賞罰皆平人服其公

劉垺器局峻整人不敢干以私嘗有故人自遠詣之垺厚遇之其人乘間求京兆判司垺曰公才不稱此官垺不敢以私害公先是執政多惡諫官言時政得失垺獨賞之

後周周行逢壻唐德求補吏行逢曰汝才不堪為吏吾今私汝則可矣汝居官無狀吾不敢以法貸汝則親戚之恩絕矣與之耕牛農具而遣之

宋司馬光論治身治國所先疏 洪範於好惡偏黨之
際六反言之重之至也周任曰為政者不賞私勞不罰
私怨大學曰欲明明德於天下者必先正其心有所
忿懣則不得其正有所好樂則不得其正陛下奮發宮
邸入纂皇極爰自潛躍至於天飛舊恩宿怨豈能盡無
然今日即政之初皆不可置於聖慮以害至正也凡人
君之要道在於進賢退不肖賞善罰惡而已爵祿者天
下之爵祿非以厚人君之所喜也刑罰者天下之刑罰

非以快人君之怒也是故古者爵人於朝與士共
之刑人於市與衆棄之明不敢以己之私心蓋天
下之公議也今以四海之廣百官之衆有智有愚
有善有惡比肩接迹雜選並進臣願陛下少留聰
明詳擇其間苟有才德高茂合於人望者進之雖
宿昔怨讐勿棄也有器識庸下無補於時者退之
雖親暱姻婭勿取也有勵行立功為世所推者賞
之雖意之所憎勿廢也有懷姦亂禁為衆所疾者

罰之雖意之所愛勿赦也如此則野無遺賢朝無曠官為善者勸為惡者懼上下悅服朝廷大治百姓蒙福祉稷永安不然陛下專居深宮自逸威福之柄盡委大臣取過目前不為遠慮賢愚不分善惡共貫不則所進者皆平生所親愛所退者皆平生所不快所賞者皆諂諛而無功所罰者皆忠諫而無罪如此則中外解體紀綱隳紊羣生失所天下可憂矣臣故曰治國莫先於公也

明察十二則

鄭子產晨出過東匠之閭聞婦人之哭也撫其御之手而聽之有間遣吏執而問之則手絞其夫者也異日其御問曰夫子何以知之子產曰其聲懼凡人於其親愛也始病而憂臨死而懼已死而哀今夫哭已死不哀而懼是以知其有姦也或曰子產之治不亦多事也乎姦必待耳目之所及而後知之則鄭國之得姦者寡矣不任典成之吏不察參伍之政不明度量恃盡聰明勞智

慮而以知姦不亦無術乎且夫物衆而智寡寡不勝衆
智不足以徧知物故因物以治物下衆而上寡寡不勝
衆者言君不足以徧知臣也故因人以知人是以形體
不勞而事治智慮不用而姦得故宋人語曰一雀過羿
羿必得之則羿誣矣以天下為之羅則雀不失夫知姦
亦有大羅不失其一而已矣不修其理而以己之胸察
為之弓矢則子產誣矣老子曰以智治國國之賊者也
子產之謂歟

戴驢宋大宰夜使人曰吾聞數夜有乘輜車至李史門者謹為我伺之使人報曰不見輜車見有奉筭而與李史語者有問李史受筭

周主亡玉簪令吏求之三日不能得也周主令人求而得之家人之屋間周主曰吾知吏之不事事也求簪三日不得之吾令人求之不移日而得之於是吏皆竦懼以為君神明也

韓昭侯使騎於縣使者報昭侯問之曰何見也對曰無

所見也昭侯曰雖然何見曰南門之外有黃犢食苗道左者昭侯謂使者毋敢泄吾所問於女乃下令曰當苗時禁牛馬入人田中國有令而吏不以為事牛馬甚多入人田中亟舉其數上之不得將重其罪於是三鄉舉而上之昭侯曰未盡也復往審之乃得南門之外黃犢吏以昭侯為明察皆悚恐其所而不敢為非

漢蓋主上官桀桑弘羊皆與燕王旦通謀詐令人為燕王上書言霍光出都肄郎羽林道上稱趨太官先置

引蘇武前使匈奴拘留二十年不降還廼為典屬國而大將軍長史敞亡功為搜粟都尉又擅調益幕府校尉光專權自恣疑有非常臣旦願歸符璽入宿衛察姦臣變候司光出沐日奏之桀欲從中下其事桑弘羊當與諸大臣共執退光書奏昭帝不肯下明旦光聞之止畫室中不入上問大將軍安在左將軍桀對曰以燕王告其罪故不敢入有詔召大將軍光入免冠頓首謝上曰將軍冠朕知是書詐也將軍亡罪光曰陛下何以知之

上曰將軍之廣明都郎屬耳調校尉以來未能十日燕王何以得知之且將軍為非不須校尉時帝年十四尚書左右皆驚而上書者果亡捕之甚急桀等懼白上小事不足遂上不聽後桀黨與有譖光者上輒怒曰大將軍忠臣先帝所屬以輔朕身敢有毀者坐之自是桀等不敢復言

晉王導遣八部從事行揚州郡國還同時俱見諸從事各言二千石官長得失獨顧和無言導問之和曰明公

作輔寧使網漏吞舟何緣採聽風聞以察察為政邪
道咨嗟稱善

范甯在豫章遣十五議曹下屬城採求風政并吏假還
訊問官長得失徐邈與甯書曰足下聽斷明允庶事無
滯則吏慎其負而人聽不惑矣豈須邑至里詣飾其游
聲哉非徒不足致益乃實蠶漁之所資豈有善人君子
而干非其事多所告白者乎自古以來欲為左右耳目
者無非小人皆先因小忠而成其大不忠先藉小信而

成其大不信遂使讒諂並進善惡倒置可不戒哉足下
慎選綱紀必得國士以攝諸曹諸曹皆得良吏以掌文
案又擇公方之人以為監司則清濁能否與事而明足
下平心處之何取耳目哉

唐太宗問房玄齡蕭瑀曰隋文帝何如主也對曰文帝
勤於為治每臨朝或至日昃五品已上引坐論事衛士
傳餐而食雖性非仁厚亦勵精之主也太宗曰公得其
一未知其二文帝不明而喜察不明則照有不通喜察

則多疑於物事皆自決不任羣臣天下至廣一日萬機
雖復勞神苦形豈能一一中理羣臣既知主意唯取決
受成雖有愆違莫敢諫爭此所以二世而亡也朕則不
然擇天下賢才寘之百官使思天下之事闕白宰相審
熟便安然後奏聞有功則賞有罪則刑誰敢不竭心力
以修職業何憂天下之不治乎因敕百司自今詔敕行
下有未便者皆應執奏毋得阿從不盡己意

德宗問陸贄近有卑官自山北來者論說賊勢語多張

皇察其事情頗似窺覘若不追尋恐成姦計贄上奏曰
以一人之聽覽而欲窮宇宙之變態以一人之防慮而
欲勝億兆之姦欺役智彌精失道彌遠項籍納秦降卒
二十萬慮其懷詐而盡阬之其於防虞亦已甚矣漢高
豁達大度天下之士至者納用不疑其於備虞可謂疎
矣然而項氏以滅劉氏以昌蓄疑之與推誠其效固不
同也陛下智出庶物有輕待人臣之心思用萬機有獨
馭區寓之意謀吞衆略有過慎之防明照羣情有先事

之察嚴東百辟有任刑致理之規威制四方有以力勝
殘之志是才能者怨於不任忠蓋者憂於見疑著勲業
者懼於不容懷反側者迫於及討馴致離叛構成灾禍
願陛下以覆轍為戒天下幸甚

宣宗密令翰林學士韋澳纂次諸州境土風物及諸利
害為一書自寫而上之雖子弟不知也號曰處分語他
日鄧州刺史薛弘宗入謝出謂澳曰上處分本州事驚
人澳詢之皆處分語中事也

宋姜公望論邏察 臣聞人君明目達聰所以通下情也前有旒左右有纒所以防太察也太察則聞人之過下情不通則不聞已過聞人之過則姦生而刑滋不見已過則心塞而禍萌此周之厲王以防口而召亡漢之顯宗以耳目隱發為明而速亂也邏者之興推求其意不過以求瑕搜匿鈎致盜詐出於不備擿發如神此一酷京兆之俗才爾使京兆為之猶可羞矧以天下為度海內為家而為良京兆之不為者乎陛下即政之三日

一切罷去天下聞之翕然歸心開口張膽人人自安告
訐不長風俗向厚比聞稍稍復置舊額通為七十人一
人量以十人為耳目十人之中一人又以十人為之散
之通途永巷不啻數十百人矣夫婦醜詆之言仇隙怒
傳之語增情飾狀擿隱挾伏何所不至人人跼蹐各各
疑慮親戚不敢誠朋友不敢信目不敢注觀手不敢直
指若此定非清世之美事也昔吳主孫權用呂壹輩舉
罪糾姦纖介必聞深按醜誣排陷無罪以作威福步騭

力詆其非權尋誅壹覺悟尚早蓋小人因緣銜命不務奉公利在憑藉威勢杜絕人口公然作過使上聰不達威柄潛移刑及無辜睽睽萬目由聞人之過不聞己過之所致也老子曰察見淵魚者不祥以察為明是誠不祥之兆也陛下豈不思畿甸之外非陛下之民乎人各有口能使之嘿嘿不議陛下政事乎既不可揜於天下何獨察察於輦轂之下以為明哉語曰天下有道庶人不議信乎有道不可得而議也伏望陛下以道御天下

使人蕩然不疑無得而議何為蹈吳之故轍而不知革
彼猶能因言以誅壹輩孰謂陛下鑒此而不能之乎願
黜獻議之人通舊額人數一切罷去除禍者必鋤其根
植福者必封其本毋謂昔有額而不可去也其根尚存
枝葉他日復生矣不可不察

蘇洵明論 天下有大知有小知人之知慮有所及有
所不及聖人以其大知而兼其小知之功賢人以其所
及而濟其所不及愚者不知大知而以其所不及喪其

所及故聖人之治天下也以常而賢人之治天下也以時既不能常又不能時悲夫殆哉夫惟大知而後可以常以其所及濟其所不及而後可以時常也者無治而無不治者也時也者無亂而不治者也日月經乎中天大可以被四海而小或不能入一室之內彼固無用此區區小明也故天下視日月之光儼然其若君父之威故自有天地而有日月以至於今而未嘗可以一日而無焉天下嘗有言曰叛父母褻神明則雷霆下擊之雷

霆固不能為天下盡擊此等輩也而天下之所以兢兢然不敢犯者有時而不測也使雷霆日轟轟焉遶天下以求夫叛父母褻神明之人而擊之則其人未必能盡而雷霆之威無乃褻乎故夫知日月雷霆之分者可以用其明矣聖人之明吾不得而知也吾獨愛夫賢者之用其心約而成功博也吾獨怪夫愚者之用其心勞而功不成也是無他也專於其所及而及之則其及必精兼於其所不及而及之則其及必麤及之而精人將曰是惟無及及則精矣不然吾恐奸雄之竊

笑也齊威王即位大亂三載威王一奮而諸侯震懼二十年
是何修何營耶夫齊國之賢者非獨一即墨大夫明矣亂齊
國者非獨一阿大夫與左右譽阿大夫而毀即墨者幾人亦
明矣一即墨大夫易知也一阿大夫易知也左右譽阿而毀
即墨者幾人易知也從其易知而精之故用心甚約而成功
博也天下之事譬如物十焉吾舉其一而人不知吾之不
知其九也歷數之至於九而不知其一不如舉一之不可測
也而况乎不至於九也

先見十八則

紂為象箸而箕子怖以為象箸必不加於土銅必將犀
玉之杯象箸玉杯必不羹菽藿則必旄象豹胎旄象豹
胎必不衣短褐而食於茅屋之下則錦衣九重廣室高
臺吾畏其卒故怖其始居五年紂為肉圃設炮烙登糟
丘臨酒池紂遂以亡故箕子見象箸以知天下之禍故
曰見小曰明

魯公索氏將祭而亡其牲孔子聞之曰公索氏比及三

年必亡矣後一年而亡弟子問曰昔者索氏亡牲夫子曰比及三年必亡矣今期年而亡夫子何以知其將亡也孔子曰祭之為言索也索也者盡也乃孝子所以自盡於親也至祭而亡其牲則餘所亡者多矣吾以此知其將亡也

楚武王荆尸授師子焉以伐隨將齊入告夫人鄧曼曰余心蕩鄧曼歎曰王祿盡矣盈而蕩天之道也先君其知之矣故臨武事將發大命而蕩王心焉若師徒無虧

王薨於行國之福也王遂行卒於楸木之下令尹鬬郤莫敖屈重除道梁澁營軍臨隨隨人懼行成莫敖以王命入盟隨侯且請為會於漢汭而還濟漢而後發喪

齊侯問於晏子曰當今之時諸侯孰危對曰莒其亡乎公曰奚故對曰地侵於齊貨竭於晉是以亡也

齊侯使晏嬰請繼室於晉既成昏晏子受禮叔向從之宴相與語叔向曰齊其何如晏子曰此季世也吾弗知齊其為陳氏矣公棄其民而歸於陳氏齊舊四量豆區

釜鍾四升為豆各自其四以登於釜釜十則鍾陳氏三量皆登一焉鍾乃大矣以家量貸而以公量收之山木如市弗加於山魚鹽蜃蛤弗加於海民參其力二入於公而衣食其一公聚朽蠹而三老凍餒國之諸市屨賤踊貴民人痛疾而或燠休之其愛之如父母而歸之如流水欲無獲民將焉辟之箕伯直柄虞遂伯戲其相胡公大姬已在齊矣叔向曰然雖吾公室今亦季世也戎馬不駕卿無軍行公乘無人卒列無長庶民罷敝而宮

室滋侈道殫相望而女富溢尤民間公命如逃寇讐藥
郤胥原狐續慶伯降在皂隸政在家門民無所依君日
不悛以樂惱憂公室之卑其何日之有讒鼎之銘曰昧
旦丕顯後世猶怠况日不悛其能久乎晏子曰子將若
何叔向曰晉之公族盡矣肸聞之公室將卑其宗族枝
葉先落則公從之肸之宗十一族唯羊舌氏在而已肸
又無子公室無度幸而得死豈其獲祀

鄭游吉如晉送少姜之葬梁丙與張趯見之梁丙曰甚

矣哉子之為此來也子太叔曰將得已乎昔文襄之霸也其務不煩諸侯令諸侯三歲而聘五歲而朝有事而會不協而盟君薨大夫弔卿共葬事夫人士弔大夫送葬足以昭禮命事謀闕而已無加命矣今嬖寵之喪不敢擇位而數於守適唯懼獲戾豈敢憚煩少姜有寵而死齊必繼室今茲吾又將來賀不唯此行也張趯曰善哉吾得聞此數也然自今子其無事矣譬如火馬火中寒暑乃退此其極也能無退乎晉將失諸侯諸侯求煩

不獲二大夫退子太叔告人曰張趯有知其猶在君子
之後乎

下蔡威公閉門而哭三日三夜泣盡而繼以血旁隣窺
牆而問之曰子何故而哭悲若此乎對曰吾國且亡曰
何以知也應之曰吾聞病之將死也不可為良醫國之
將亡不可為計謀吾數諫吾君吾君不用是以知國之
將亡也於是窺牆者聞其言則舉宗而去之於楚居數
年楚王果舉兵伐蔡窺牆者為司馬將兵而往來虜甚

衆問曰得無有昆弟故人乎見威公縛在虜中問曰若何以至於此應曰吾何以不至於此且吾聞之也言之者行之役也行之者言之主也汝能行我能言汝為主我為役吾亦何以不至於此哉窺墻者乃言之於楚王遂解其縛與俱之楚故曰能言者未必能行能行者未必能言

蔡侯宋公鄭伯朝於晉蔡侯謂叔向曰子亦奚以語我對曰蔡言地計不若宋鄭其車馬衣裘侈於二國諸侯

其有圖蔡者乎處期年荆伐蔡而殘之

田子顏自大術至乎平陵城下見人子問其父見人父問其子田子方曰其以平陵反乎吾聞行於內然後施於外子顏欲使其衆甚矣後果以平陵叛

石乞侍坐於屈建屈建曰白公其為亂乎石乞曰是何言也白公至於室無營所下士者三人與已相若臣者五人所與同衣食者千人白公之行若此何故為亂屈建曰此建之所謂亂也以君子行則可於國家行過禮

則國家疑之且不苟難下其臣必不難高其君矣建是
以知夫子將為難也處十月白公果為難

呂覽長見篇 智所以相過以其長見與短見也今之
於古也猶古之於後世也今之於後世亦猶今之於古
也故審知今則可知古知古則可知後古今前後一也
故聖人上知千歲下知千歲也荆文王曰覓謔數犯我
以義違我以禮與處則不安曠之而不穀得焉不以吾
身爵之後世有聖人將以非不穀於是爵之五大夫申

侯伯善持養吾意吾所欲則先我為之與處則安曠之而不穀喪馬不以吾身遠之後世有聖人將以非不穀於是送而行之申侯伯如鄭阿鄭君之心先為其所欲三年而知鄭國之政也五月而鄭人殺之是後世之聖人使文王為善於上世也晉平公鑄為大鐘使工聽之皆以為調矣師曠曰不調請更鑄之平公曰工皆為調矣師曠曰後世有知音者將知鐘之不調也臣竊為君恥之至於師涓而果知鐘之不調也是師曠欲善調鐘

以為後世之知音者也呂太公望封於齊周公旦封於魯二君者甚相善也相謂曰何以治國太公望曰尊賢上功周公旦曰親親上恩太公望曰魯自此削矣周公旦曰魯雖削有齊者亦必非呂氏也其後齊日以大至於霸二十四世而田成子有齊國魯公以削至於僮三十四世而亡吳起治西河之外王錯譖之於魏武侯武侯使人召之吳起至於岸門止車而望西河泣數行而下其僕謂吳起曰竊觀公之意視釋天下若釋躡今

去西河而泣何也吳起抵泣而應之曰子不識君知我而使哉畢能西河可以王今君聽讒人之議而不知我西河之為秦取不久矣魏從此削矣吳起果去魏入楚有間西河畢入秦秦日益大此吳起之所先見而泣也魏公叔痤疾惠王往問之曰公叔之疾嗟疾甚矣將奈社稷何公叔對曰臣之御庶子鞅願王以國聽之也為不能聽勿使出境王不應出而謂左右曰豈不悲哉以公叔之賢而今謂寡人必以國聽鞅悖也及公叔死公

孫鞅西遊秦秦孝公聽之秦果用彊魏果用弱非公叔
痤之悖也魏王則悖也夫悖者之患固以不悖為悖

先識篇 凡國之亡也有道者必先去古今一也地從
於城城從於民民從於賢故賢主得賢者而民得民得
而城得城得而地得夫地得豈必足行其地人說其民
哉得其要而已矣夏太史令終古出其圖法執而泣之
夏桀迷惑暴亂愈甚太史令終古乃出奔如商湯喜而
告諸侯曰夏王無道暴虐百姓窮其父兄恥其功臣輕

其賢良棄義聽讒衆庶咸怨守法之臣自歸於商殷內
史摯見紂之愈亂迷惑也於是載其圖法出亡之周武
王大說以告諸侯曰商王大亂沈於酒德辟遠箕子爰
近姑與息妣己為政賞罰無方不用法式殺三不辜民
大不服守法之臣出奔周國晉太史屠黍見晉之亂也
見晉公之驕而無德義也以其圖法歸周周威公見而
問焉曰天下之國孰先亡對曰晉先亡威公問其故對
曰臣比在晉也不敢直言示晉公以天妖日月星辰之

行多以不當曰是何能為又示以人事多不義百姓皆
鬱怨曰是何能傷又示以隣國不服賢良不舉曰是何
能害如是是知所以亡也故臣曰晉先亡也居三年
晉果亡威公又見屠黍而問焉曰孰次之對曰中山次
之威公問其故對曰天生民而令有別有別人之義也
所異於禽獸麋鹿也君臣上下之所以立也中山之俗
以晝為夜以夜繼日男女切倚固無休息康樂歌謠好
悲其主弗知惡此亡國之風也臣故曰中山次之居二

年中山果亡威公又見屠黍而問焉曰孰次之屠黍不
對威公固問焉對曰君次之威公乃懼求國之長者得
義蒔田邑而禮之得史麟趙駢以為諫臣去苛令三十
九物以告屠黍對曰其尚終君子之身乎曰臣聞之國
之興也天遺之賢人與極言之士國之亡也天遺之亂
人與善諛之士威公薨肆九月不得葬周乃分為二故
有道者之言也不可不重也周鼎著饗饗有首無身食
人未啜害及其身以言報更也為不善亦然白圭之中

山中山之王欲留之白圭固辭乘輿而去又之齊齊王欲留之仕又辭而去人問其故曰之二國者皆將亡所學有五盡何謂五盡曰莫之必則信盡矣莫之譽則名盡矣莫之愛則親盡矣行者無糧居者無食則財盡矣不能用人又不能自用則功盡矣國有此五者無事必亡中山齊皆當此若使中山之王與齊王聞五盡而更之則必不亡矣其患不聞雖聞之又不信然則人主之務在乎善聽而已矣夫五割而與趙悉起而距軍乎濟

上未有益也是棄其所以存而造其所以亡也

漢賈誼先醒篇 懷王問於賈君曰人之謂知道者為

先醒何也賈君對曰此博號也大者在人主中者在卿
大夫下者在布衣之士乃其正名非為先醒也彼世主
不學道理則嘿然惛於得失不知治亂存亡之所由怵
怵然猶醉也而賢主者學問不倦好道不厭惠然獨先
廼學道理矣故未治也知所以治未亂也知所以亂未
安也知所以安未危也知所以危故昭然先寤乎所以

存亡矣故曰先醒辟猶俱醉而獨先發也故世主有先醒者有後醒者有不醒者昔楚莊王即位自靜三年以講得失乃退僻邪而進忠正能者任事而後在高位內領國政辟草而施教百姓富民恒一路不拾遺國無獄訟當是時也周室壞微天子失制宋鄭無道欺昧諸侯莊王圍宋伐鄭鄭伯肉袒牽羊奉簪而獻國莊王曰古之伐者亂則整之服則舍之非利之也遂弗受乃南與晉人戰於兩棠大克晉人會諸侯於漢陽申天子之辟禁

而諸侯說服莊王歸過申侯之邑申侯進飯日中而王
不食申侯請罪曰臣齋而具食甚潔日中而不飯臣敢
請罪莊王喟然嘆曰非子之罪也吾聞之曰其君賢君
也而又有師者王其君中君也而有師者伯其君下君
也而羣臣又莫若者亡今我下君也而羣臣又莫若不
穀不穀恐亡自憂也吾聞之世不絕賢天下有賢而我
獨不得若吾生者何以食為故莊王戰服大國義從諸
侯戚然憂恐聖知在身而自錯不肖思得賢佐日中忘

飯可謂明君矣先寤所以存亡此先醒也 昔宋昭公
出亡至於境喟然嘆曰嗚呼吾知所以亡矣吾朝臣千
人發政舉吏無不曰吾君聖者侍御者數百人被服而
立無不曰吾君麗者吾外內不聞吾過吾是以此吾
困宜矣於是革心易行衣苴布食鱗鮫畫學道而夕講
之二年美聞於宋宋人車徒迎而復位卒為賢君諡
昭公既亡矣而乃寤所以存此後醒者也昔者虢君驕
恣自伐謫諛親貴諫臣誅逐政治躡亂國人不服晉師

伐之虢人不守虢君出走至於澤中曰吾渴而欲飲其御乃進清酒曰吾飢而欲食御進腍脯梁糗虢君喜曰何給也御曰儲之久矣曰何故儲之對曰為君出亡而道飢渴也君曰知寡人亡邪對曰知之曰知之何以不諫對曰君好諂諛而惡至言臣願諫恐先說亡虢君作色而怒御謝曰臣之言過也有間君曰吾之亡者誠何也其御曰君弗知耶君之所以亡者以大賢也虢君曰賢人之所以存也亡何也對曰天下之君皆不肖夫疾

君君之獨賢也故亡號君喜據式而嘆曰嗟乎賢固若是苦耶遂徒行即於山中居飢倦枕御膝而卧御以塊自易逃行而去君遂餓死為禽獸食此已亡矣猶不悟所存亡此不醒者也故先醒者也時而伯後醒者三年而復不醒者枕土而死為虎狼食嗚呼戒之哉

孝宣皇帝之時霍氏奢靡茂陵徐先生曰霍氏必亡夫在人之右而奢亡之道也孔子曰奢則不遜夫不遜者必侮上侮上者逆之道也出人之右人必害之今霍氏

秉權天下之人疾害之者多矣夫天下害之而又以逆
道行之不亡何待乃上書言霍氏奢靡陛下即愛之宜
以時抑制無使至於亡書三上輒報聞其後霍氏果滅
董忠等以其功封人有為徐先生上書曰臣聞客有過
主人者見竈直墀傍有積薪客謂主人曰曲其墀遠其
薪不者將有火患主人嘿然不應居無幾何家果失火
鄉聚里中人哀而救之火幸息於是殺牛置酒燔髮灼
爛者在上行餘各用功次坐而反不錄言曲墀者向使

主人聽客之言不費牛酒終無火患今茂陵徐福數上書言霍氏且有變宜防絕之向使福說得行則無裂地出爵之費而國安平自如今往事既已而福獨不與其功惟陛下察客徙薪曲突之策而使居燔髮灼爛之右書奏上使人賜徐福帛十匹拜為郎

晉何曾侍武帝宴退而告遵等曰國家應天受禪創業垂統吾每宴見未嘗聞經國遠圖惟說平生常事非貽厥孫謀之兆也及身而已後嗣其殆乎此子孫之憂也

汝等猶可獲沒指諸孫曰此等必遇亂亡也及綏死蒿哭
之曰我祖其殆聖乎

董養字仲道陳留浚儀人也泰始初到洛下不干祿求
榮及楊后廢養因游太學升堂嘆曰建斯堂也將何為
乎每覽國家赦書謀反大逆家赦至於殺祖父母父母
赦者以為王法所不容也奈何公卿處議文飾禮典以
至此乎夫人之理既滅大亂作矣因著無化論以非之
永嘉洛城東北步廣里中地陷有二鵝出焉其蒼者飛

去白者不能飛養聞嘆曰昔周時所盟會狄泉即此地也今有二鵝蒼者胡象白者國家之象其可盡言乎顧謂謝鯤阮孚曰易稱知幾其神乎君等可深藏矣乃與妻荷擔入蜀莫知其終

齊東昏侯自在東宮不好學唯嬉戲無度及即位不與朝士相接專親信宦官及左右御刀應教等是時始安王遙光尚書令徐孝嗣右僕射江祐右將軍蕭坦之侍中江祀衛尉劉暄更直內省分日帖敕雍州刺史蕭衍

聞之謂從舅錄事參軍張弘策曰一國三公猶不堪况六貴同朝勢必相圖亂將作矣避禍圖福無如此州乃密與弘策修武備聚驍勇以萬數多伐材竹沈之檀溪積茅如岡阜皆不之中兵參軍呂僧珍覺其意亦私具櫓數百張是時衍兄懿行郢州事行使弘策說懿曰今六貴比肩人自畫敕爭權睚眦理相圖滅主上媒近左右慄輕忍虐安肯委政諸公嫌忌積久必大

行誅戮吾兄弟幸守外藩宜為身計郢州控帶
荆湘雍州士馬精彊世治則竭誠本朝世亂則
足以匡濟與時進退此萬全之策也

宋王安石既執政士大夫多以為得人呂誨獨
言其不通時事大用之則非所宜將對學士司
馬光亦將詣經筵相遇並行光密問今日所言
何事誨曰袖中彈文乃新參也光愕然曰衆喜
得人奈何論之誨曰君實亦為是言邪安石雖

有時名然好執偏見輕信姦回喜人佞已聽其
言則美施於用則踈置諸宰輔天下必受其禍
且上新即位所與圖治者二三執政而已苟非
其人將敗國事此乃心腹之疾顧可緩邪上疏
言大姦似忠大詐似信安石外示朴野中藏巧
詐驕蹇慢上陰賊害物誠恐陛下悅其才辯久
而倚庇大姦得路羣陰彙進則賢者盡去亂由
是生臣究安石之迹固無遠畧惟務改作立異

於人徒文言而飾非將罔上而欺下臣竊憂之
誤天下蒼生必斯人也疏奏帝方眷注安石還
其章疏誨遂求去安石亦求去帝謂曾公亮曰
若出誨恐安石不自安安石曰臣以身許國陛
下處之有義臣何敢以形迹自嫌苟為去就乃
出誨知鄧州誨既斥安石益橫光由是服誨之
先見自以為不及也誨三居言職始論陳旭次論
歐陽修最後論王安石凡三見黜人推其鯁直

見幾七則

客或欲見於齊桓公請仕上官授祿千鍾公以告管仲
曰君予之客聞之曰臣不仕矣公曰何故對曰臣聞取
人以人者其去人也亦用人吾不仕矣

伐虢之役師出於虞宮之竒諫而不聽出謂其子曰虞
將亡矣唯忠信者能留外寇而不害除閻以應外謂之
忠定身以行事謂之信今君施其所惡於人閻不除矣
以賄滅親身不定矣夫國非忠不立非信不固既不忠

信而留外寇寇知其釁而歸圖焉已自拔其本矣何以能久吾不去懼及焉以其孥適西山三月虞乃亡

趙簡子曰晉有澤鳴犢犢魯有孔丘吾殺此三人則天下可圖也於是乃召澤鳴犢犢任之以政而殺之使人聘孔子於魯孔子至河臨水而觀曰美哉水洋洋乎丘之不濟於此命也夫子路趨進曰敢問奚謂也孔子曰夫澤鳴犢犢晉國之賢大夫也趙簡子之未得志也與之同聞見及其得志也殺之而後從政故丘聞之剗胎

焚天則麒麟不至乾澤而漁蛟龍不遊覆巢毀卵則鳳凰不翔
丘聞之君子重傷其類者也

漢陳咸以律令為尚書平帝時王莽輔政多改漢制咸心非之
及莽因呂寬事誅不附己者何武鮑宣等咸乃嘆曰易稱君子
見幾而作不俟終日吾可以逝矣即乞骸骨去職及莽篡位召
咸以為掌寇大夫謝病不肯應時三子參豐欽皆在位乃悉令
解官父子相與歸鄉里閉門不出入猶用漢家祖臘人問其故
咸曰我先人豈知王氏臘乎其後莽復徵咸遂稱病篤

晉齊王同辟張翰為大司馬東曹掾同時執權翰謂同郡顧榮曰天下紛紛禍難未已夫有四海之名者求退良難吾本山林間人無望於時子善以明防前以智慮後榮執其手愴然曰吾亦與子採南山蕨飲三江水耳翰因見秋風起乃思吳中菰菜葦羹鱸魚膾曰人生貴得適志何能羈宦數千里以要名爵乎遂命駕而歸著首丘賦文多不載俄而回敗人皆謂之見幾然府以其輒去除吏名翰任心自適不求當世或謂之曰卿乃可縱適一時獨不為身後名耶答曰使我有身後名不如即時

一盃酒時人貴其曠達

韋忠字子節平陽人也少慷慨有不可奪之志好學博通性
不虛諾閉門修己不交當世每至吉凶親表贈遺一無所受
年十二喪父哀慕毀悴杖而後起司空裴秀弔之匍匐號訴
哀慟感人秀出而告人曰此子長大必為佳器歸而命子頡
造焉服闋遂廬於墓所顧慕而造之皆託行不見家貧藜藿
不充人不堪其憂而忠不改其樂頡為僕射數言於司空張
華華辟之辭疾不起人問其故忠曰吾茨簷賤士本無宦情

且茂先華而不實裝顏慙而無厭棄典禮而附賊后若此豈大丈夫之所宜行耶裴常有心託我常恐洪濤蕩蕩截餘波見漂汎可臨尾閭而闕沃焦哉

唐楊元琰為衛尉卿先是元琰知武三思寢用事請棄官為僧中宗不許敬暉聞之笑曰使我早知勸上許之髡去胡頭豈不妙哉元琰多鬚類胡故暉戲之元琰曰功成名遂不退將危此乃由衷之請非徒然也暉知其意瞿然不悅及暉等得罪元琰獨免

審微 七則

齊桓公使管仲求甯戚甯戚應之曰浩浩乎管仲不知
至中食而慮之婢子曰公何慮管仲曰非婢子之所知
也婢子曰公其母少少母賤賤昔者吳下戰未亂不得
入軍門國子擿其齒遂入爲干國多百里奚秦國之飯
牛者也穆公舉而相之遂霸諸侯由是觀之賤豈可賤
少豈可少哉管仲曰然公使我求甯戚甯戚應我曰浩
浩乎吾不識婢子曰詩有之浩浩者水育育者魚未有

室家而安召我居甯子其欲室乎

桓公外舍而不弔饋中婦諸子謂宮人盍不出從乎君將有行宮人皆出從公怒曰孰謂我有行者宮人曰賤妾聞之中婦諸子公召中婦諸子曰女言聞吾有行也對曰妾人聞之君外舍而不弔饋非有內憂必有外患今君外舍而不弔饋君非有內憂也妾是以知君之將有行也公曰善此非吾所與女及也而言乃至焉吾是以語女吾欲致諸侯而不至爲之奈何中婦諸子曰自

妾之身之不爲人持接也未嘗得人之布織也意者更容不審邪明日管仲朝公告之管仲曰此聖人之言也君必行也

桓公與管仲謀伐莒謀未發而聞於國桓公恠之以問管仲管仲曰國必有聖人也桓公嘆曰歎日之役者有執柘杵而上視者意其是邪乃令復役無得相代少焉東郭垂至管仲曰此必是也乃令儻者延而進之分級而立管子曰子言伐莒者也對曰然管仲曰我不言伐

莒子何故言伐莒對曰臣聞君子善謀小人善意臣竊意之也管仲曰我不言伐莒子何以意之對曰臣聞君子有三色優然喜樂者鐘鼓之色愀然清靜者練經之色勃然充滿者此兵革之色也日者臣望君之在臺上也勃然充滿此兵革之色吁而不吟所言者莒也君舉臂而指所當者莒也臣竊慮小諸侯之未服者其惟莒乎臣故知之君子曰凡耳之聞以聲也今不聞其聲而以其容與臂是東郭垂不以耳聽而聞也桓公管仲雖

善謀不能隱聖人之聽於無聲視於無形東郭垂有之矣故桓公乃尊祿而禮之

呂覽精諭篇 聖人相諭不待言有先言言者也海上之人有好蜻者每居海上從蜻游蜻之至者百數而不止前後左右盡蜻也終日玩之而不去其父告之曰聞蜻皆從女居取而來吾將玩之明日之海上而蜻無至者矣勝書說周公旦曰廷小人衆徐言則不聞疾言則人知之徐言乎疾言乎周公旦曰徐言勝書曰有事於

此而精言之而不明勿言之而不成精言乎勿言乎周公旦曰勿言故勝書能以不言說而周公旦能以不言聽此之謂不言之聽不言之謀不聞之事殷雖惡周不能疵矣口喑不言以精相告紂雖多心弗能知矣目視於無形耳聽於無聲商聞雖衆弗能窺矣同惡同好志皆有欲雖爲天子弗能離矣孔子見溫伯雪子不言而出子貢曰夫子之欲見溫伯雪子好矣今也見之而不言其故何也孔子曰若夫人者目擊而道存矣不可以

容聲矣故未見其人而知其志見其人而心與志皆見
天符同也聖人之相知豈待言哉白公問於孔子曰人
可與微言乎孔子不應白公曰若以石投水奚若孔子
曰没人能取之白公曰若以水投水奚若孔子曰淄澠之
合者易牙嘗而知之白公曰然則人不可與微言乎孔
子曰胡爲不可唯知言之謂者爲可耳白公弗得也知
謂則不以言矣言者謂之屬也求魚者濡爭獸者趨非
樂之也故至言去言至爲無爲淺智者之所爭則末矣

此白公之所以死於法室齊桓公合諸侯衛人後至公朝而與管仲謀伐衛退朝而入衛姬望見君下堂再拜請衛君之罪公曰吾於衛無故子曷爲請對曰妾望君之入也足高氣彊有伐國之志也見妾而有動色伐衛也明日君朝揖管仲而進之管仲曰君舍衛乎公曰仲父安識之管仲曰君之揖朝也恭而言也徐見臣而有慙色臣是以知之君曰善仲父治外夫人治內寡人知終不爲諸侯笑矣桓公之所以匿者不言也今管子乃以

容貌音聲夫人乃以行步氣志桓公雖不言若暗夜而
燭燎也晉襄公使人於周曰弊邑寡君寢疾卜以守龜
曰三塗爲祟弊邑寡君使下臣願藉途而祈福焉天子
許之朝禮使者事畢客出萇弘謂劉康公曰夫祈福於
三塗而受禮於天子此柔嘉之事也而客武色殆有他
事願公備之也劉康公乃敝戎車卒士以待之晉果使
祭事先因令楊子將卒十二萬而隨之涉於棘津襲聊
阮梁蠻氏滅三國焉此形名不相當聖人之所察也萇

引則審矣故言不足以斷小事唯知言之謂者可爲
觀表篇 凡論人心觀事傳不可不熟不可不深天爲
高矣而日月星辰雲氣雨露未嘗休也地爲大矣而水
泉草木毛羽裸鱗未嘗息也凡居於天地之間六合之
內者其務爲相安利也夫爲相害危者不可勝數人事
皆然事隨心心隨欲欲無度者其心無度心無度者則
其所爲不可知矣人之心隱匿難見淵深難測故聖人
於事志焉聖人之所以過人以先知先知必審徵表無

徵表而欲先知堯舜與衆人同等徵雖易表雖難聖人則不可以飄矣衆人則無道至焉無道至則以爲神以爲幸非神非幸其數不得不然邱成子吳起近之矣邱成子爲魯聘於晉過衛右宰穀臣止而觴之陳樂而不樂酒酣而送之以璧顧反過而弗辭其僕曰鄉者右宰穀臣之觴吾子也甚懼今侯渫過而弗辭邱成子曰夫止而觴我與我懼也陳樂而不樂告我豪也酒酣而送之我以璧寄之我也若由是觀之衛其有亂乎倍衛三

十里聞寧喜之難作右宰穀臣死之還車而臨三舉而歸至使人迎其妻子隔宅而異之分祿而食之其子長而反其璧孔子聞之曰夫智可以微謀仁可以託財者其郈成子之謂乎郈成子之觀右宰穀臣也深矣妙矣不觀其事而觀其志可謂能觀人矣古之善相馬者寒風是相口齒麻朝相頰子女厲相目衛忌相髭許鄙相腕投伐褐相胸脅管青相臏肋陳悲相股脚秦牙相前齧君相後凡此十人者皆天下之良工也其所以相者不

同見馬之微一也而知節之高卑足之滑易材之堅脆能之長短非獨相馬然也人亦有微事與國皆有微聖人上知千歲下知千歲非意之也蓋有自云也綠圖幡薄從此生矣

察微篇 使治亂存亡若高山之與深谿若白堊之與黑漆則無所用智雖愚猶可矣且治亂存亡則不然如可知如不可知如可見如不可見故智士賢者相與積心愁慮以求之猶尚有管叔蔡叔之事與東夷八國不

聽之謀故治亂存亡其始若秋毫察其秋毫則大物不
過矣魯國之法魯人爲人臣妾於諸侯有能贖之者取
其金於府子貢贖魯人於諸侯來而讓不取其金孔子
曰賜失之矣自今以往魯人不贖人矣取其金則無損
於行不取其金則不復贖人矣子路拯溺者其人拜之
以牛子路受之孔子曰魯人必拯溺者矣孔子見之以
細觀化遠也楚之邊邑曰卑梁其處女與吳之邊邑處
女桑於境上戲而傷卑梁之處女卑梁人操其傷子以

讓吳人吳人應之不恭怒殺而去之吳人往報之盡屠
其家甲梁公怒曰吳人焉敢攻吾邑舉兵反攻之老弱
盡殺之矣吳王夷昧聞之怒使人舉兵侵楚之邊邑克
夷而後去之吳楚以此大隆吳公子光又率師與楚人
戰於雞父大敗楚人獲其帥潘子臣小帷子陳夏齧又
反伐郢得荆平王之夫人以歸實爲雞父之戰凡持國
太上知始其次知終其次知中三者不能國必危身必
窮孝經曰高而不危所以長守貴也滿而不溢所以長

守富也富貴不離其身然後能保其社稷而和其民人
楚不能之也鄭公子歸生率師伐宋宋華元率師應之
大棘羊斟御明日將戰華元殺羊餐士羊斟不與焉明
日戰怒謂華元曰昨日之事子爲政今日之事我爲制
遂驅入於鄭師宋師敗績華元虜夫駑機差以米則不
發戰大機也饗士而忘其御也將以此敗而爲虜豈不
宜哉故凡戰必悉熟偏備知彼知己然後可也魯季氏
與郈氏鬪雞郈氏介其雞季氏爲之金距季氏之雞不

勝季平子怒因歸郈氏之宮而益其宅郈昭伯怒傷之於昭公曰禘於襄公之廟也舞者二人而已其餘盡舞於季氏季氏之舞道無上久矣弗誅必危社稷公怒不審乃使郈昭伯將師徒以攻季氏遂入其宮仲孫氏叔孫氏相與謀曰無季氏則吾族也死亡無日矣遂起甲以往陷西北隅以入之三家爲一郈昭伯不勝而死昭公懼遂出奔齊卒於乾侯魯昭聽傷而不辯其義懼以魯國不勝季氏而不知仲叔氏之恐而與季氏同患也

是不達乎人心也不達乎人心位雖尊何益於安也以魯國恐不勝一季氏況於三季同惡固相助權物若此其過也非獨仲叔氏也魯國皆恐魯國皆恐則是與一國爲敵也其得至乾侯而卒猶遠

賈誼審微篇 善不可謂小而無益不善不可謂小而無傷非以善爲一足以利天下小不善爲一足以亂國家也當此輕始而傲微則其流必至於大亂是故子民者謹焉彼人也登高則望臨深則窺人之性非窺且望

也勢使然也夫事有逐奸勢有召禍老聃曰爲之於未
有治之於未亂管仲曰備患於未形上也語曰燒爇弗
滅炎炎奈何萌芽不伐且折斧柯智禁於微故也事之
適亂如地形之惑人也機漸而往俄而東西易面人不
自知也故墨子見衢路而哭之悲一跬而繆千里也昔
者衛侯朝於周周行問其名曰衛侯辟疆周行還之曰
啓疆辟疆天子之號也諸侯弗得用衛侯更其名曰爇
然後受之故善守上下之分者雖空名弗使踰焉古者

周禮天子葬用隧諸侯縣下周襄王出迓伯閑晉文公率師誅賊定周國之亂復襄王之位於是襄王賞以南陽之地文公辭南陽即死得以隧下襄王弗聽曰周國雖微未之或代也天子用隧伯父用隧是二天子也以地爲少余請益之文公乃退禮天子之樂宮縣諸侯之樂軒縣大夫直縣士有琴瑟叔於奚者衛之大夫也曲縣者衛君之樂體也繁纓者君之駕飾也齊人攻衛叔於奚率師逆之大敗齊師衛於是賞以溫叔於奚辭溫

而請曲縣繁纓以朝衛君許之孔子聞之曰惜也不如多與之邑夫樂者所以載國國者所以載君彼樂亡而禮從之禮亡而政從之政亡而國從之國亡而君從之惜也不如多予之邑宓子治亶父於是齊人攻魯過亶父始父老請曰麥已熟矣今迫齊寇民不及刈獲請令民人出自刈附郭者歸可以益食且不資寇三請宓子弗聽俄而麥畢資於齊寇季孫聞之怒使人讓

宓子曰豈不可哀哉民乎寒耕熟耘曾弗得食也弗知猶可聞或以告而夫子弗聽宓子蹴然曰今年無麥明年可樹令不耕者得穫是樂有寇也且一歲之麥於魯不加彊喪之不加弱令民有自取之心其創必數年不息季孫聞之慙曰使穴可入吾豈忍見宓子哉故明者之感奸由也蚤其餘亂謀也遠故邪不前達

善處事 五則

唐憲宗遣中使賜朱克融時服克融以爲踈惡執留敕使奏以春衣不足乞度支給三十萬端匹又奏欲將兵馬及丁匠五千助脩宮闕上患之以問宰相欲遣使臣宣慰仍索敕使裴度對曰克融無禮已甚殆將斃矣譬如猛獸自於山林中咆哮跳踉久當自困必不敢輒離巢穴願陛下勿遣宣慰亦勿索敕使旬日之後徐賜詔書云聞中官至彼稍失去就俟還朕自有處分時服有

司置造不謹朕甚欲知之已令區處其將士春衣非朕所愛但素無此例不可獨與所稱助脩宮闕皆是虛語若欲直挫其姦宜云丁匠宜速遣來若欲且示含容則云不假丁匠遠來如是而已不足勞聖慮也上悅從之敬宗時朝廷得劉悟遺表議者多言上黨內鎮與河朔異不可許李絳上疏曰兵機尚速威斷貴定人情未一乃可伐謀劉悟死已數月朝廷尚未處分中外人意惜此事機所幸劉從諫未嘗久典兵馬而昭義素貧必無

優賞其衆必不盡與從諫同謀但速除近地一將令兼程赴鎮使從諫未及布置新使已至潞州則軍心自有所繫矣今朝廷久無處分彼軍不曉朝廷之意猶豫之間若有姦人爲之畫策虛張賞設軍士覲望尤難指揮伏望速下明敕宣示軍衆獎其從來忠節賜新使緡五十萬匹使之賞設續除從諫一刺史必無違拒臣嘗熟計利害決無即授從諫之理時李逢吉王守澄計議已定竟不用絳等謀


宗真宗時西夏管內饑趙德明表求粟百萬朝議不知所出或言德明方納款而敢渝誓請降詔責之王旦曰第詔德明云已敕有司具粟百萬於京師其遣衆來取德明得詔慚曰朝廷有人

宸妃李氏杭州人實生仁宗太后既取帝爲己子與楊太妃保護之李氏默然處先朝嬪御中未嘗自異人畏太后亦無敢言者以是帝雖春秋長不自知爲李氏出也至是疾革乃自順容進位宸妃薨太后欲以宮人禮

治喪於外呂夷簡奏禮宜從厚太后遽引帝起有頃復獨立簾下召夷簡問曰一宮人死相公云云何也夷簡對曰臣待罪宰相事無內外皆當預也后怒曰相公欲離間吾母子耶夷簡對曰陛下不以劉氏爲念臣不敢言尚念劉氏則喪禮宜從厚后悟乃以一品禮殯於洪福院夷簡又謂入內都知羅崇勳曰宸妃當以后服殮用水銀實棺異時勿謂夷簡不道及也崇勳懼馳告太后乃許之

元武宗命右丞相托克托御史大夫布哩葉棟領府事
取河南蒙古軍萬人隸之王約曰左衛率府舊制有之
今置右府何爲諸公深思之不可以累儲宮也太子又
命取安西兵器給宿衛士約謂詹事完澤曰詹事移文
千里取兵器人必驚疑主上聞之奈何完澤愧曰實慮
不及此家令薛居言陝西分地五事命往理之約不爲
署行語之曰太子潛龍也當勿用之時爲飛龍之事可
乎遂止太子喜諭羣下曰事未經王彥博議者勿啓一

日約方啓事二宦官侍側太子問曰自古宦官壞人家
國有諸對曰宦官善惡皆有之但恐處置失宜耳太子
深然其言



經濟類編卷九十